



Wann een un d'Ofkierzung AHA denkt, do fält deene meeschte Leit wuel direkt déi norwegesch Museksgrupp a-ha an. Zu Lëtzebuerg hunn dës Buschtawen awer eng ganz aner Bedeitung. Dohannert steet nämlech d'Allianz vun Humanisten, Atheisten an Agnostiker.

Fir d'éischt wier et wuel interessant ze wëssen, wat et iwwerhaupt mat de **Begrëffer** Humanisten, Atheisten an Agnostiker op sech huet. Während en **Humanist** (Persoun, fir déi de Mënsch am Vierdergrond steet) an en **Atheist** (Persoun, déi d'Existenz vu Gott ofleent) der Allgemengheet geleeft sinn, wäerte wuel déi mannste Leit eppes mam **Ausdrock** Agnostiker kënnen ufänken. En Agnostiker geet dervun aus, datt et sech net **beweise** léisst, ob et e Gott oder iergendeng Form vu göttleche

Wiesen **existéieren** oder net. Am Joer 2010 ass soumadder dës A.s.b.l. (Association sans but lucratif) an d'Liewe geruff ginn, fir deene **Mënschen** eng **Plattform** ze ginn, déi dës Glawensrichtunge verrieden. Am **Moment** kënn d'AHA op ronn 850 **Memberen**, déi dës **Associatioun** ideologesch verrieden a finanziell duerch **Cotisatiounen** a **Spenden** ënnerstëtzen.

Hiert **Motto** „Net reliéis? Stéi dozou!“ ass relativ kloer ze verstoen. Si wëllen de Leit zu Lëtzebuerg **Courage** maachen, datt si sech op kee Fall ze verstoppe brauchen, wann si net un e **Gott** gleewen. „Mir wëllen eigentlech eng humanistesche an net-reliéis Liewensweis an Ethik vermëttelen, déi op enger rationaler an naturalistescher Siicht op d'Welt fondéiert“, erkläert de Bob Reuter, **Tresorier** vun der AHA.

„Net reliéis? Stëi dozou!“

www.AHA.LU

Hir Haaptziler kann een a véier **Rubricke** („Wëssenschaft statt Glawen“, „Ethik – fräi vun Dogmen“, „Feieren – ouni Gott“ an „Trennung vu Kierch a Staat“) zesumme faassen. An engem éischte Punkt sinn si der **Meenung**, dass een d'Welt a wéi se funktionéiert nämlech wëssenschaftlech am beschten erkläere kéint. „Mir sinn immens skeptesch, wat Dogmen ugeet. Dofir ass et an eisen Aen net richtig, dorun ze gleewen, dass déi helleg Texter, déi déi éiweg Wourechte säit Urzäite festhalen, Basis fir d'Usiichten iwwer d'Welt sinn“, gétt de Bob Reuter ze verstoen.

Des Weidere steet fir d'AHA déi individuell **Fräiheet** vum Mënsch am **Mëttelpunkt**. D'Mënsche sollen zesummen erausfannen, wéi eng **Wäerter** si fir sech an awer och fir hirt Zesummeliewe mat aneren, fir déi richtig halen. „Et wier et sech ze einfach gemaach, wa mer eis der **Autoritéit** vun enger **Gottheit** oder soss engem Leader ënnerwerfe géingen. De Mënsch soll sech net aus der **Verantwortung** drécke kënnen a soll sech selwer Gedanke maachen, wat e gutt fënnt a wat net“, liwwert den Tresorier Informatiounen zu dësem Punkt.

Ausserdeem huet d'AHA sech zum Zil gesat, dass de Mënsch déi wichteg Momenter wéi z.B. d'**Gebuert** vun engem Kand oder

d'Feiere vun enger **Hochzäit** soll selwer gestalten an nei erfanne kënnen. D'Ënnerstëtzer vun dëser Associatioun sinn der **Meenung**, dass een dat net enger **Reliounsgemeinschaft** sollt iwwerloossen.

Zu gudder Lescht ass dës Grupp dovunner iwwerzeegt, dass et fir eng oppe **Gesellschaft** einfach nëmme besser ass, wann de Staat net mat enger Glawensgemeinschaft – virun allem mat der kathoulescher Kierch hei zu Lëtzebuerg – sou enk zesummenhängt. Dofir waren si och bei der **Diskussioun** vun der **Trennung** vu **Kierch** a **Staat** ganz dofir, well si net wollten hunn, dass de Staat Glawensgemeinschaften finanziell ënnerstëtze geet. Fir de **Reliounsunterricht**, deen op eng Promotioun vun enger Reliounsgemeinschaft an hirem **Glawen** an hire Ritualer pocht, war d'AHA och strikt dergéint.

Fir hir Ziler ze erreechen oder promovéieren ze kënnen, bedreift d'Allianz vill Sensibiliséierungs- an Iwwerzeegungsaarbecht bei der Politik, bei de Medien a bei der Gesellschaft. Op dës Manéier versichen se e **Bewosstsinn** ze schafen, wat d'Interessen an d'Rechter vun den net-reliéise Mënsche sinn. Iwwer Pressecommuniquéen, Lieserbréiwer a Werbecampagnë ginn dës **Iddien** der **Ëffentlechkeet** matgedeelt. Op där anerer





Hand organiséiert d'AHA awer och Ewenter, wou se sech mat Gläichgesënnten trëfft, fir ënner anerem iwwer déi uewen erwänten **Themen** ze diskutéieren. „Eent vun eisen Haaptfester ass d'Huesefest. Dernieft arrangéiere mer nach sou muench thematesch Kinosowenter an och Konferenzen zu Theme ronderëm den Atheismus an den Humanismus“, geet den AHA-Member méi an den Detail.

Ënnerstëtzung fënnt dës Associatioun och nach hei am Grand-duché, wou si mat verschiddene **Veräiner** am Kader vun der Reliouns- a Meenungsfräiheet zesummeschafft. Virun allem mam CCAL (Cercle de Coopération des Associations Laïques) besteet méi eng enk **Zesummenaarbecht**. Mee dës Vernetzung gi bis iwwer d'Lëtzebuenger Grenzen eraus. Grouss **Sympathien** huet d'AHA

fir Veräiner, déi e **Faibel** fir d'Promotioun vum sekulären **Humanismus** hunn. Et ass dofir net verwonnerlech, datt si Member vun den „Humanist International“ an den „European Humanist Federation“ sinn. Zesumme mat dëser Grupp gëtt op europäeschem an internationalem Niveau probéiert, hir **Iwwerzeegungen** ze **stärken** an ze **verméttelen**. Dat **Engagement**, fir seng Iwwerzeegungen ze kämpfen, gëtt awer net all einzeler Persoun op dëser Welt erméiglecht. „An enger Partie Länner riskéiert een ëmmer nach ëmbruecht ze ginn, wann een sech derzou bekennt, datt een net un déi an deem Land dominant Gottheit gleeft“, warnt de Bob Reuter. An där Hisiicht bleift also nach vill Iwwerzeegungsarbecht ze leeschten.

En Artikel vum Laurent Neiertz